

SL(5)704 – Cod Ymarfer Gwariant Ymgyrch Pleidiau Gwleidyddol (Etholiadau'r Senedd) 2020

Cefndir a diben

Mae'r Cod hwn yn rhoi canllawiau ynghylch yr hyn sy'n dod o fewn paragraffau 1 a 2 o Atodlen 8 o Ddeddf Pleidiau Gwleidyddol, Etholiadau a Refferenda 2000 (Deddf 2000) a'r hyn nad yw'n dod o'u mewn. Mae'r paragraffau hynny'n berthnasol i'r diffiniad o 'gwariant ymgyrch' ac yn enwedig felly i ba dreuliau y mae'n ofynnol i blaid wleidyddol roi gwybod amdanynt

Mae gan y Comisiwn Etholiadol bŵer o dan baragraff 3 o Atodlen 8 I Ddeddf 2000 i baratoi Cod Ymarfer yn rhoi canllawiau ynghylch y mathau o dreuliau sy'n dod o fewn paragraffau 1 a 2 o Atodlen 8 ac nad ydynt yn dod o'u mewn.

Cafodd y Cod Ymarfer hwn ei baratoi gan y Comisiwn Etholiadol a'i gyflwyno i Weinidogion Cymru i'w gymeradwyo. Caiff y Cod ei ddyroddi gan y Gweinidog Tai a Llywodraeth Leol o dan baragraff 3 o Atodlen 8 i Ddeddf 2000.

Gweithdrefn

Negyddol drafft.

Mae Gweinidogion Cymru wedi gosod fersiwn ddrafft o'r Cod gerbron y Senedd. Os, o fewn 40 diwrnod i'r dyddiad y cafodd y fersiwn drafft hon ei gosod (ac eithrio unrhyw ddiwrnodau pan fo'r Senedd wedi ei: (i) diddymu neu (ii) ar doriad am fwy na phedwar diwrnod), bydd y Senedd yn penderfynu peidio â chymeradwyo'r Cod drafft, ni ddylai Gweinidogion Cymru ddyroddi'r Cod.

Os na chaiff penderfyniad o'r fath ei wneud, mae'n rhaid i Weinidogion Cymru ddyroddi'r Cod (yn y ffurf ddrafft) a bydd y Cod yn dod i rym ar ddiwrnod a nodir mewn Gorchymyn gan Weinidogion Cymru.

Gwaith craffu o dan Reol Sefydlog 21.7

Nodwyd tri phwynt i gyflwyno adroddiad arnynt o dan Reol Sefydlog 21.7 mewn perthynas â'r Cod hwn.

1. Bydd y Cod yn dod i rym ar ôl i'r cyfnod rheoleiddiedig ddechrau. Nodir bod y Nodyn Esboniadol yn cynnwys y datganiad a ganlyn:

"Mae'r cyfnod rheoleiddiedig ar gyfer pleidiau gwleidyddol yn dechrau ar 6 Ionawr 2021.



"Er na fydd Cod Ymarfer Gwariant Ymgyrch Pleidiau Gwleidyddol (Etholiadau'r Senedd) 2020 mewn grym erbyn 6 Ionawr bydd y Comisiwn Etholiadol yn cyhoeddi canllawiau cyn i'r Cod Ymarfer fod mewn grym i sicrhau bod gwybodaeth ar gael."

2. Mae paragraffau 1.24 ac 1.25 o'r Cod yn crynhoi darpariaethau Deddf 2000 ynghylch gwariant tybiannol, fel yr amlinellir yn adran 73 o Ddeddf 2000. Nod y pwynt bwled cyntaf ym mharagraff 1.24 yw crynhoi un o'r amodau sy'n penderfynu a ddylid trin gwariant tybiannol ar ymgyrch fel gwariant ymgyrch a achoswyd gan y blaid. Yn benodol, mae paragraff 1.24 yn nodi'r amod a ganlyn: *"pan fydd eiddo, gwasanaethau neu gyfleusterau yn cael eu trosglwyddo neu eu darparu am ddim neu am ddisgownt o fwy na 10 y cant i'w defnyddio gan y blaid neu er budd y blaid"*. Yn yr un modd, mae paragraff 1.25 yn cyfeirio at *"ei gwerth ar y farchnad (pan gaiff ei throsglwyddo'n ddi-dâl), neu werth y disgownt"*.

Fodd bynnag, mae adran 73 o Ddeddf 200 yn gwahaniaethu rhwng y ffordd yr ymdrinnir â throsglwyddo eiddo a darparu eiddo, gwasanaethau a chyfleusterau. Felly, gellir ystyried bod y crynodebau hyn yn gorsymleiddio materion.

Er na fyddai'r Cod yn trechu rhwymedigaethau Deddf 2000, mae'n bosibl y gall arwain at gamddeall y sefyllfa os yw'r person yn darllen y Cod yn unig.

3. Nodir bod y Cod drafft a ddarparwyd fel rhan o'r ymgynghoriad yn wahanol i'r Cod a osodwyd gerbron y Senedd. Er bod rhai o'r newidiadau yn gymharol fach - er enghraifft, adlewyrchu'r newid enw o Gynulliad Cenedlaethol Cymru i Senedd Cymru - mae newidiadau eraill yn ymdrin â phwyntiau sylweddol.

Nid yw tarddiad y newidiadau yn glir. Yn benodol, nid yw'n glir a gafodd y newidiadau eu gwneud gan y Comisiwn Etholiadol yn sgil yr ymgynghoriad neu gan Weinidogion Cymru. Os yw'r drafft sydd bellach wedi'i osod gerbron y Senedd yn cynnwys newidiadau a benderfynwyd gan Weinidogion Cymru, nodir bod yn rhaid cyflwyno datganiad o'r rhesymau am y newidiadau i gyd-fynd â'r Cod yn unol â pharagraff 3(5) o Atodlen 8 i Ddeddf 2000. Gan nad oes datganiad o'r fath wedi'i osod, tybir mai'r Comisiwn Etholiadol oedd yn gyfrifol am y newidiadau. Gofynnir i Lywodraeth Cymru gadarnhau ffynhonnell y newidiadau.

Ymateb y Llywodraeth

Mae ymateb gan y Llywodraeth wedi ei wahodd mewn cysylltiad â'r ail a'r trydydd pwynt, ac mae ymateb iddynt wedi ei nodi isod.

2. Rydym yn ddiolchgar am y sylwadau mewn cysylltiad â pharagraffau 1.24 ac 1.25 o'r Cod sy'n cyfeirio at wariant ymgyrch tybiannol fel y'i nodir yn adran 73 o Ddeddf Pleidiau Gwleidyddol, Etholiadau a Refferenda 2000 (DPGER). Er ein bod yn gwerthfawrogi'r sylwadau hynny, mae'r Cod wedi ei ddrafftio i gynorthwyo'r darlennydd wrth benderfynu ar wariant ymgyrch tybiannol ac mae'r Cod yn glir bod y gyfraith ar wariant gan bleidiau gwleidyddol wedi ei nodi yn DPGER. Rydym wedi ein bodloni bod y Cod yn darparu canllawiau digonol i'r darlennydd.



Ar ben hynny, byddem yn ychwanegu bod y rheolau ynghylch “darparu” a “trosglwyddo” wedi eu cwmpasu mewn dwy linell ar wahân yn y ddeddfwriaeth ac rydym wedi ein bodloni bod y modd y mae wedi ei aralleirio yn y Cod yn cwmpasu’n union yr un rheolau ag a nodir yn adran 73 o DPGER, ac o ganlyniad ni ddylai achosi unrhyw ddryswch.

3. Gallwn gadarnhau mai’r Comisiwn Etholiadol a wnaeth y newidiadau yn sgil ymgynghori.

Rydym wedi cael ein hysbysu gan y Comisiwn Etholiadol i’r Cod gael ei ddiwygio yn dilyn adborth o’r ymgynghoriad yng Nghymru, ond ystyriodd hefyd adborth a gafwyd gan bleidiau gwleidyddol a rhanddeiliaid eraill yn dilyn yr ymgynghoriadau yn yr Alban ac yn Lloegr, gan fod y Comisiwn am sicrhau bod yr holl Godau yn gyson pan fo hynny’n bosibl.

Trafodaeth y Pwyllgor

Trafododd y Pwyllgor y Cod Ymarfer gydag ymateb y Llywodraeth yn ei gyfarfod ar 18 Ionawr 2021 ac mae’n cyflwyno adroddiad i’r Senedd yn unol â’r pwyntiau adrodd uchod.

